

Gwo jin 'Kwar ma Buulus gom 'Kwani gi Paŋ KULUUSI mo

Monthe Me'd mo

¹ ABuulus, a'di jin karu ki she/ mo goma Kristhos jin ta'da Yesus mo ki bwa ma Arumgimis mo dhala Timuthawuuus jin ta'da kam bana mo.

² E uni kun dhunu ki she/ ki dhelel dhelel mo dhali iwak kun ta ku isinj gana/ mo eya Kristhos mo, uni kun 'kokin mo e Paŋ Kuluusi mo.

A'the e um mo dhali monku'th is 'peni Arumgimis jin ta'da Babam bana mo be.

Mon'tho ma Buulus mo gom 'Kwani kun Gami Gwo Is mo e Paŋ Kuluusi mo

³ Aman isa yempa/ 'bora Arumgimis bwa i is mo, a'di jin ta'da Baba gi Tapa Yesus Kristhos bana mo, me'd jin 'thokina aman mo gom um mo, ⁴ haali/ aman cikkina gwo gom mongam gwo is bum eya Kristhos jin ta'da Yesus mo dhali mo/en jin takina um mo goma ris uni 'baar mo kun dhunu ki she/ ki dhelel dhelel mo, ⁵ haali/ mo ma 'teŋ kape/ a'di karkunu mo gom um e momis mo. Gom a'di yansan mo tani um cikki gwo ntwa/a/ mo e gwo jin ta gwon gana/ mo, a'di jin ta gwom 'borga/ mo, ⁶ a'di jin pu'dki'd e um mo, me'd a'di ka jinj gana/ diki'd e mony'ceshi 'baar mo mmodho'thkina a'di maman mo dhali mmo'twakkina a'diya 'twak mo – wakan e bwam um ki is bum mo 'pena tee jin cikkina um a'di mo dhali mish a'di 'ban mo, a'di jin ta'da 'the ma Arumgimis mo e gwon gana/ mo,

⁷ me'd jin da/arkina um a'di mo 'pena Abapraas mo, a'di jin ta'da garr bam jin enu jin mii to mo. A'di ta a'di isin̄ gana/ mo jin mii to goma Kristhos mo gom gway bam mo ⁸ dhali a'di torki a'di aman mo gom mo/en bum e Shi/in mo be.

⁹ Dhali wakan 'pena tee jin cik̄kina aman a'di mo tani aman yisa dakkina 'tho mo mmo'tho mo gom um mo, mmodoṭa/ doṭ mo ki um minu 'taki 'tu'd mo ki monyith̄ bwam piti mo eya ris miin to gi shi/in gi moyuk̄ mo dhali momish gwo 'ban mo, ¹⁰ mmosusa sus e bway mii kun mini ha me'd gom Tapa mo, mmo'tu'd mo ki mii kun mini 'bor a'di bwa i is mo mmok̄al mamana dho'th mo goma ris miim 'borga/ mo dhali mmomara mar is mo ki monyith̄ha/ Arumgimis mo be. ¹¹ Dhalki um 'bitha is mo eya ris mom'bithi 'baar mo isi ki monycam piti jin ca'bki dem dem mo goma ris mo jin 'dimuwa 'dim 'kup mo dhali bwa jin 'kuçu ki 'kari'th mo ki mon'kuny bwa mo, ¹² mmociya Baba bwam 'boro'di is mo, a'di jin thumki ana mo mmonyak̄ mal pwak̄ ki uni kun dhunu ki she/ ki dhelel dhelel mo e monkush mo be. ¹³ A'di 'cuk̄ki ana mo 'peni mom'bi'th gi mondthurumi'd mo, mmo'cith̄ ana agap mo e bampa/ gi Ya/m piti jin ena a'di mo, ¹⁴ e a'di jin takina ana mo jin wanuwa wan 'ba/ mo dhali amure/ gi miinthus jin dhalkunu ana 'pen mo be.

Mon'tu'd ma Arumgimis jin 'Tu'dki'd mo

¹⁵ A'di jin bu'thki jamas ma Arumgimis mo, a'di jin molu mish ki e ga 'cesh mo, a'di jin ta'da bwa nyara/ jin twa/a/ ka ris to 'baar mo kun uku mo be. ¹⁶ Haali/ e a'di mo tani aris to 'baar mo 'kokunu

mo mmo/uk mo e momis mo dhali e mony'cesh mo, uni gun mishu ki e ga 'cesh mo, dhali uni kun molu par e ki e ga 'cesh mo, wakki/ adhana kursi ma malikmo walla mo jin tanu tapa mo, walla mom'bi'th kun molu gadhir mo walla moshirr mo tani – aris to 'baar mo 'kokunu mo mmo/uk mo e a'di mo dhali gom a'di mo be. ¹⁷ A'di diki'di twa/ a/ ka ris to 'baar mo, dhali e a'di mo tani aris to 'baar mo tulkunu 'twa/'kup mo e a'di mo mmontal 'de/ mo be. ¹⁸ A'di ta'da 'kanj'kup gom bungwar is mo a'di jin ta'da kaniisa mo. A'di ta montel 'pen mo, a'di ta'da bwa nyara/ 'peni mowu mo, ki a'di eya ris to 'baar mo tani midi 'taki ta isa 'cilman gana/ mo be. ¹⁹ Haali/ e a'di mo tani arisa 'tu'd kun ta ku ma Arumgimis mo tani 'borkina bwa mo mmota gi monj'ko mo be. ²⁰ Dhali e a'di mo tani a'di gwamki'da gwam ki is pitij gana/ mo eya ris to 'baar mo, wakki/ to gun 'kon e mony'cesh mo walla e momis mo tani a'di karki mo ma ku'th is ka bas piti ki cwany'cithan dhul mo be.

²¹ Dhali um kun 'thissa/ 'kokin ka piye/ 'peni a'di mo dhali kun ta 'kup ki 'kup eya dum bum mo mmomii to kun ta thus ki thus mo tani ²² a'di shwane/ gwamki'da gwam mo ki is piti mo jin ta shuman is ki jwam piti mo, ki mii gi wakan mo tani a'di midi tor um eya tente/ mo me'd ku gun dhelelkin mo dhali kun dar gi thalkin mo dhali ku gun mini dar gi mo ma wak ibwambori a'di mo, ²³ ba shi/ mii a'dan 'te/ ba/, wakki/ um mini tikir 'ko mo e mongam gwo is mo, ki monka'b mo dhali tel sho'k mo, yisa mmoti'k mo 'peni mo ma 'ten kape/ gi gwom 'borga/ jin cikkina um mo, a'di jin cikunu aris 'kwani 'baar mo kun ukkunu mo e

bwanj'kwariny momis mo, dhali gom a'di mo tani
aha/ jin tana Buulus warkina ka manmii a'di mo
be.

ABuulus Miiki To mo goma Kaniisa mo

²⁴ Dhali shwane/ aha/ 'kunykina bwa mo e is pem mo jin 'koshki aha/ ka nyor mo gom gway bum mo, dhali e shuman is pem mo tani aha/ thimkina a'di jin harkunu mo e mo jin tocuwa Kristhos bwa mo gom gway gi bungwar is piti mo, a'di jin ta'da kaniisa mo. ²⁵ A'di jin warkika/ ka manmii to mo isi ki gwo jin piyi'd 'peni Arumgimis mo gom mo jin taka/ amandhu gwo mo, a'di jin cikunu aha/ mo gom um mo mmokar gwo ma Arumgimis ki a'di minu mish eya tente/ mo, ²⁶ a'di jin ta gwo ma Arumgimis jin bagu mo, a'di jin ba'kkunu ki she/ yil ka ris mo dhali mo ma nyakum yil gun tanu mo, dhali hili shwane/ a'di torkunu eya tente/ ki kum piti kun dhunu ki she/ ki dhelel dhelel mo. ²⁷ E uni mo tani Arumgimis ki kar bwa mo mmotor eya tente/ mo ka dhan mii kun wani caa e 'kwani kun 'koki ta 'Kwani Yahuuda/ mo ki monyca jin ta pa ki pa mo e gwo yansan jin çinu ki jim bag mo, a'di jin ta'da Kristhos jin di'd e um mo, jin ta mo ma 'teñ kape/ gi monyca mo be. ²⁸ A'di jin bahkina aman gwo mo mmoruma ris 'kwani 'baar ka 'dete/ 'dete/ ki gwo mo dhali tora ris 'kwani 'baar ka 'dete/ 'dete/ gwo mo eya ris moyuk mo ki aman mina 'taki dhuwa ris 'kwani 'baar ka 'dete/ 'dete/ mo ki ku gun isin mo eya Kristhos mo be. ²⁹ Haali/ gom mii yan mo tani aha/ miikina mii jin 'batha'ba'th mo, mmo/uth mo ki is jin umu'di 'baar mo, a'di jin thi'thki'da thi'th mo e aha/ mo.

2

¹ Haali/ aha/ ona bwa ki um mini mish mo mo ka dhan mii jin picirkika/ mo gom um mo dhali uni gwansan kun 'kon mo e Pa Lawudikiyya mo dhali goma ris uni 'baar mo kun 'koki par jis em pem e mo ² ka dum buni minu 'taki 'bi'th is mo me'd jin re'dkunu uni mo mmontal 'de/ mo e mo/en mo, mmota ga ris mo kun tanu pa ki pa mo gi momish mo mo 'pena dun gana/ mo dhali monyitha/ Arumgimis gwom bag yan mo a'di jin ta'da Kristhos mo. ³ E a'di mo tani aris moyuk⁴ kun ishki kumma/ mo dhali mo jin nyithuwa nyith mo be. ⁴ Aha/ ona gwo yansan mo wakan ki wathin tal 'deñ kamu/ midi 'taki diki he'k um e mo ki gwo ma mak jin onu mo. ⁵ Ba aha/ pina e bunqwar is mo tani hili aha/ dina e um ki shi/in mo, mmo'kuny bwa mo mmopar miim 'boron bum kun miina um ka para po/ e mo dhali mom bum jin tela um sho'k mo ki mongam gwo is bum eya Kristhos mo be.

⁶ Wakan, me'd jin bu'thkina uma Kristhos jin ta'da Yesus jin ta Tapa mo tani wakan 'koyi e a'di mo, ⁷ mmotana um ka birman mo e a'di mo dhali mmonyanya um is mo e a'di mo dhali mmotela um sho'k mo e mongam gwo is mo, jasi me'd gwo jin torkunu um mo, mmoso ki sho'k bum e mo jin 'boruwa 'bor bwa i is mo be.

Mon'tu'd jin 'Tu'dki'd jin Ta Mondiki/ e eya Kristhos mo

⁸ Jiyi mo ki e ki 'bore/ mo ki wathin tal 'deñ kamu/ midi diki 'kwar um ka gwapi/ mo ki gwoñ 'kwaniñ gañgascha/ mo dhali ki gwo kun hekuwa he'k e kun 'ko bwa 'te/ mo, isi ki gwoñ 'kwani en'thin dhamo/ mo kun luku mo, isi ki gwo ma

bwa nyara/ gom gwoŋkan gi mony'cesh yan mo, dhali yisa isi ki gwo ma Kristhos mo. ⁹ Haali/ e a'di mo tani mon'tu'd ka 'bimpil mo jin ta ji ma Arumgimis mo mmotana a'di Arumgimis mo tani ç'a'bki'd e bunjwar is piti mo. ¹⁰ Dhali um pu'dkin mo mmo'tu'da/ 'tu'd mo e mondiki/ em piti mo, a'di jin ta'da 'kaŋ'kup goma ris montapa kun tanu mo dhala ris moshirr mo be. ¹¹ Dhali e a'di mo si'da/ um 'kokunu mo mmo'citha/ munyjal yis mo ka munyjal yis jin 'cithu/ ki dar gi me'd mo, ki mii jin dhalu bunjwar is gi shuman is 'pen mo e mo ma munyjal yis jin 'cithu/ jin ta ji ma Kristhos mo. ¹² Dhali um 'kokunu mo mmokan mo nyakki a'di mo e mo jin cuçuwa cuc mo dhali e mii jin 'kokunu mmocu um mis mo si'da/ nyakki a'di e mongam gwo is mo e mo/um ma Arumgimis mo, a'di jin 'de'kki a'di mo 'peni mowu mo be. ¹³ Dhali um, um kun 'kokin mo mmowu mo e gwon dhaŋ mo dhali e mo ma munyjal yis bum jin 'konuki 'cith um mo e shuman is bum mo tani Arumgimis a'di ki dhu ki e mmontal 'de/ nyakki a'di mo, mmodhalkina a'di ana aris gwon dhaŋ bana 'pen mo, ¹⁴ mmo'koshkina a'di gwo jin 'kwarkunu mo jin diki'da po/ ana mo, a'di jin theke'thi'da theke'th mo gom gwoŋkan mo be. A'di yansan idhalkina a'di ka po/ mo, mmoṭelkina a'di a'di ka musmaar mo apo/ cwany'cithan dhul mo. ¹⁵ A'di dininki mom'bi'th kun molu gadhir she/ mo dhali mom'bi'th mo, dhali a'di ki tor uni eya tente/ mo jin mina uni ta she/mm mo mmopikina a'di uni e ki mii mo be.

Simmi To E mo kun Ta ku gi Momis mo

¹⁶ Wakan dhalki wathin ṭal 'deñ kamu/ ki dhal bway mo mmokar gwo waꝝ apo/ um mo e gwo jin doꝝwa doꝝ mo gom ton̄e/ mo dhali tom̄pi mo walla gom mo ma yuꝝ jin yuꝝ ka tul 'kup mo walla goma appen this mo walla goma cim ma pesu/ mo. ¹⁷ Uni gwansan ta jasa kashira/ gom to kun mini pu'du/ mo, hili bun̄gwar is gi mii mo tani uni ta ku ma Kristhos mo be. ¹⁸ Dhalku/ ki dhal wathin 'deñ kamu/ bway mo mmothu'th um thum mo, mmodi'b um is mo mmowu is ka 'cesh mo dhali luŋ iman'doyu gwo mo, mmodoshkina a'di apo/ tonyjan piti mo, mmose mo ki 'pura/ 'pura/ ki dar gi 'kup mii mo ki bwa gi bun̄gwar is 'te/ mo. ¹⁹ Dhali yisa mmotela a'di e a'di jin ta'da 'Kan'kup mo. 'Peni a'di mo tani bun̄gwar is ka 'bimpil thipki'da thip mo dhali re'di montal 'de/ ki mom piti gun gamu is mo dhala billa/ mo mmo'twak mo ki mon'twak jin di'd 'peni Arumgimis mo be.

²⁰ Wakki/ um wukin mo nyakka Kristhos mo gom gwo ma bwa nyara/ gom gwoŋkan gi mony'cesh yan mo tani gomatinta 'kokina um ki moŋ'ko mo jin cila 'kwaniny'cesh mo? Atinta 'dapkina um 'twa/ mo ki gwoŋkan jin 'tashuwa 'tash bway mo? ²¹ Uni gun o gwo mo ki: Dhalku/ to ki bu'th is ki me'd mo. Dhali, Dhalku/ to ki nyok mo. Dhali, Dhalku/ to ki ta is ki me'd mo. ²² (Uni ta to gwansani 'baar mo kun minu 'ce'd sho'k mo mmomii uni mo), isi ki gwoŋkan gi 'kwani en'thi/ mo dhali gwo kun ṭoru mo? ²³ Uni gwansan ka jin gana/ miikunu 'pena por ma piye/ mo mmoshusha du mo gom mii ma gayiin jin ta'da tēteŋ gana/ mo dhali mo jin wunu is ka 'cesh mo dhali diki 'tash bun̄gwar is 'twa/ mo, hili uni 'koki ta to gun 'bitha

she/ ki 'bi'th mo mmonona non mo 'peni mii gi bungwar is jin din ma du ki 'thup mo.

3

¹ Wakki/ um 'deku mo nyakka Kristhos mo tani simmi mii e mo gom to gun ta ku gi momis mo, e mo jin din ma Kristhos mo, e mo jin ca'bkina a'di ka bim poros ma Arumgimis mo be. ² Dhuyi adum bum gom to gun 'kon e momis mo, yisa gom to gun 'kon e mony'cesh mo. ³ Haali/ um wukin mo dhali mon'koki/em bum a'di bagkunu mo nyakka Kristhos eya Arumgimis mo be. ⁴ Ka Kristhos, a'di jin ta mon'koki/em bana minu piyu/ mo tani um si'da/ minu piyu/ mo nyakki a'di mo e monyca mo be.

Miin Dhamo/ mo dhali Miin This mo

⁵ Wakan, 'koshi mii ga 'cesh jwa mo kun 'kon e um mo, kun ta mo gun miinu miinyçal mo dhali mo gun 'dalu e mo dhali e kun dhunu ki 'thir 'thir mo dhali bwan thus kun pishu is mo dhali mo jin 'thothu/ bwa mo, a'di jin ta mii jin lunju tompinycon mo be. ⁶ Gom mii gwansan mo tani a'di ipu'dkin ma nyor ma Arumgimis apo/ iya/ gi 'kwani kun ushi gwo ha e mo. ⁷ E mii gwansan 'thissa/ mo tani um iikin e uni mo me'd jin 'kokina um mo e bwam uni mo be. ⁸ Hili shwane/ dhuyi uni 'baar mo 'pen ka pije/ mo, mii ma nyor mo, dhali anyor jin dekki'da dekmo, dhali mii gun dupa dupi e mo dhali mo ma thu'th 'pen jin thudhu ka sor gun walu mo dhali gwo nyogga/ 'peni 'twam bum mo. ⁹ Dhalku/ ki ta ator ka rem 'kup mo, mmomisha um ki um dhalki mii gi buyempan dhamo/ 'pen mo ki miim piti

kun bočkina um mo. ¹⁰ Dhali um ki hi'th miim buyempan this mo, a'di jin ukkunu mo dok/e e monyitha/ nyith mo 'ko'di jamas gi a'di jin ukki'da uk mo. ¹¹ Mmahan mo tani Wathin Griki dhali Wathi/ Yahuuda/ mini mol 'ko ki she/ mo, dhali mo ma munyjal yis jin 'cithu/ mo dhali mo ma munyjal yis jin 'konuki 'cith mo, dhali wathi/ jin diki wal 'twaŋ Griki mo dhali jin mii mii kun kaŋkama kaŋkam mo, dhali ciŋkina/ jin yolu mo dhali wathi/ jin di ki 'kus mo, hili aKristhos a'di ta to 'baar mo dhali e ana 'baar mo be.

¹² Wakan, hithi ma mii gwansan mo, me'd unij gana/ kun kwanykin ma Arumgimis mo, um kun dhelelkin mo dhali kun enu mo, mii gi wakansan mo kun ta mii kun kwojuwa kwo'c e i is mo dhali mii kun miinu ki bwankush mo dhali mii gun dhunu is ki gwa'd mo dhali mii kun miinu ka 'thup e mo dhali mii kun 'kuçu bwa ki 'kari'th mo, ¹³ mmothona thon me'di 'ko'd ka rem 'kup mo dhali, wakki/ wathin 'deŋ kamu/ ta gi gwo walla/ apowa kamuj kamu/ mo tani dhali adhal gi miinthus 'pen ka rem 'kup mo ma. Me'd mii jin dhalkina Tapa uma mure/ miinthus bum 'pen mo tani um si'da/ mini mii dhalka mure/ miinthus 'pen mo. ¹⁴ Dhali apowa ris mii gwansani 'baar mo tani hithi mo/en mo, a'di jin dekki'da ris to 'baar mo mmontal 'de/ mo ki 'bor gana/ mo ki dar gi mo ma dhadharmu'th mo. ¹⁵ Dhali dhalki moŋku'th is ma Kristhos bway mo mmojiya dum bum mo e a'di ka jin gana/ jin yukkunu um mo e buŋwar isa 'de/ mo, dhali mmoči mo jin 'boruwa 'bor bwa i is mo. ¹⁶ Dhalki gwo ma Kristhos ca'ba'd e um ki ca'b 'pempaŋ gana/ mo me'd mii jin ḥorkina um

gwo mo dhali mmorogom gwo ka rem 'kup mo ka ris moyuk^{mo}, dhali me'd jin yuk^{kina} um gway mo mmoka mo jin miinuwa mii e mo dhali gway jin maŋjuwa maŋ mo dhali gway jin yu^{ku} gom to gi shi/in mo ki mii jin 'boruwa 'bor bwa i is eya dum bum goma Arumgimis mo be. ¹⁷ Dhali ma eya ris to gunn kun mina um imii mo tani e gwo gun ona um mo walla mii gun miina um mo tani miiyi aris to 'baar mo ki gway gi Tapa Yesus mo mmoči mo jin 'boruwa 'bor bwa i is ka Arumgimis mo, a'di jin ta'da Baba e a'di mo be.

*Mo jin Nyaku To Mii mo e Moŋ'ko 'Kwani gi
Moŋ'kok/ en This mo*

¹⁸ Up 'dapi ki me'd ki gwo gi ikathim bum mo me'd gwo jin ha me'd e Tapa mo. ¹⁹ 'Kwaniŋ gwas, eni up bum mo ma, dhali dhalki uni ki 'cwar mo. ²⁰ Uçiya, hayi gwo gi icim e mo dhali gwo gi ikwan e mo goma ris to 'baar mo, haali/ mii yansan mo tani a'di ki 'bor Tapa bwa mo. ²¹ Ibaba, dhalku/ ki rukuny uçim bum ka nyor mo, isi ciki/ uni mini 'koki 'bitha du is mo. ²² Çinkina/ kun yoluwa, hayi gwo e eya ris to 'baar mo gi uni gwansan kun ta tapam bum mo e mony'cesh mo, yisa ki mii kun miinu e jis/en 'kwani mo mmo'bor 'kwani bwa mo 'te/ yisa, hili ka dun tał 'de/ mo mmoko/ Tapa mo be. ²³ Ma eya risa tu'c bum gunn kun miina um mo tani miiyi a'di ki bwaj gana/ mo me'd jin miina um Tapa to mo, dhali yisa gom 'kwaniya, ²⁴ mmomishkina um 'peni Tapa mo ki um mini bu'th mal mo me'd tom bum jin ish kumma/ mo. Um miiki Tapa Kristhos to mo be. ²⁵ Haali/ amanthu'th to mii mo tani a'di minu

doku/ tonthus apo/ a'di jin miikina a'di mo dhali
mii jin miinu ka gwar 'de/ yisa di'da.

4

¹ Itapa, miiyi çin̄kinam bum kun yola um ki mii
ma ɺar/e mo dhali ki dar gi mii ma gwar 'de/ mo,
mmomisha um si'da/ ki um ta gi Tapam bum e
momis mo.

² Tikiri mosho'k tel mo e mon'tho mo mmotimk-
ina ɻuma tim mo gom a'di ki mo jin 'boruwa 'bor
bwa i is mo ³ dhali 'thoyi mo gom am si'da/ ka
Arumgimis midi 'taki ɻa'd amana campur gom
gwo mo, mmobah gwo ma Kristhos jin cinu ki jim
bag mo gom gway gi a'di jin dikika/ eya sijin mo
⁴ ki aha/ mina 'taki ɻor a'di eya tente/ me'd jin migi/
'taki ɻor a'di ɻa ba/.

⁵ Boti ki mii ki is bum gana/ ki yuk yuk mo 'kupki
uni gwansan kun 'kona piye/ mo mmowara tee is
mo. ⁶ Dhalki gwom bum kun ona um isa yempa/
mo ta gwo ma 'the mo dhali kun ɻemesa ɻemes ka
'doŋkoro/ mo, wakan ki um mini mish mo mo gwo
kun mina um ɻa ba/ ithok ɻwani 'baar ka 'dete/
'dete/ mo.

Kwalany 'Te/Ba/. Monthe Me'd mo

⁷ Tikikus a'di midi tor uma ris to 'baar mo kun
miika/ mo. A'di ta'da kam bana jin enu mo dhali ta
a'di isin̄ gana/ mmomii to mo dhali agarr jin ta'da
manmii to e Tapa mo be. ⁸ Aha/ hashkina a'di i um
mo gom isi gwonj 'kup gwo yan gana/ mo ki um
mini mish mo mo gom 'kom bam jin 'kona am mo
dhali ki a'di midi 'taki 'bi'th uma dum bum is mo,
⁹ dhali nyakki a'di mo si'da/ a'di jin ta'da Unisiimus
mo, a'di jin ta isin̄ gana/ mo, dhali jin ta'da kam

bana jin enu mo, a'di jin ta jan 'de/ gi is bum gana/ mo. Uni mini ṭor uma ris to 'baar mo kun buthi mo mo e mo yan mo.

¹⁰ Aristarkus jin ta'da agarr pem jin nyakkaa/ ḥa'b eya sijin mo tani theki um me'd mo dhala Markus jin ta nam ma Barnaaba mo (isi gwo gom a'di jin bu'thkina um mmoye'thkunu um sho'k ki gwo mo – waḳki/ a'di midi pu'dku/ i um mo tani buthi a'di mo ma), ¹¹ dhala Yesuu/ a'di jin yukkunu gway ka Yusthus mo. 'Kwani gwansan uni ta jasi uni kun 'cithkunuwa munyjal yis mo e bwaman uni kun nyakkaa/ ṭu'c mii mo gom Bampa/ ma Arumgimis mo, dhali uni ita momalas pem mo be. ¹² Abapraas, a'di jin ta jan ṭal 'de/ ki is bum mo, jin ta'da manmii to goma Kristhos jin ta'da Jesus mo tani theki um me'd mo, isa yempa/ mmoka um e mo ka dun dara'd mo e mon'thom piti mo, ki um mini 'taki dosh mo me'd ku gi isin mo dhali mmomish mo ki isi mish gana/ 'baar mo a'di jin ta bwa ma Arumgimis mo be. ¹³ Haali/ aha/ tana aman/o gwo gom a'di mo haali/ a'di miiki'da ṭu'c jin 'batha'ba'th mo gom um mo dhali gom uni gwansan kun 'kon e Pa Lawudikiyya mo dhali e Pa Hiyarabulis mo be. ¹⁴ ALuuuka, a'di jin ta'da hakiim jin enu mo dhala Dimas mo theki um me'd mo. ¹⁵ Çiki monthe me'd pem eya waḳ kun 'kon e Pa Lawudikiyya mo dhali eya Nimpaaš mo dhala kaniisa jin di'd e gu'b ma yim mo. ¹⁶ Dhali ki gwo yansan deñkunu e mo e bwam um mo tani dhalki a'di si'da/ deñu e mo eya ḫaniisa gi Pa Lawudikiyya mo be dhali hili ki 'bore/ ki um ki deñ gwo yan e si'da/ gwo 'peni Pa Lawudikiyya mo. ¹⁷ Dhali oya Arkibbus gwo mo ki: Hili ki 'bore/ ki /e mini thim to

mii mo a'di jin bu'thkina /e 'peni Tapa mo.

¹⁸ Aha/ Buulus i'kwarkina gwo monthe me'd yan ki me'd pem gana/ mo. Kayi amakk~~ki~~iyam pem e jin dekkunu aha/ mo. A'the midi di gom um mo.

Gwo Ma Arumgimis Uduk New Testament and OT Portions

copyright © 2005 SIM International

Language: Uduk

Translation by: SIM International

Uduk New Testament and OT Portions

Published by Bible Alliance Mission, 1983.

. If you are interested in obtaining a printed copy, please contact the SIM at www.sim.org.

. This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-02

PDF generated using Haiola and XeLaTeX on 11 Nov 2022 from source files dated 29 Jan 2022

f734434c-b6bd-5d21-abc6-692c3842e034